

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info

Webwerf: <http://www.nuwelied.info>

DIE FEESTYE VAN YHVH

Les 2: DIE EERSTE FEESSEISOEN: PESAG (Die Pasga)

INHOUD VAN LES 2:

- ❖ Inleiding en Hersiening
- ❖ Instelling en Betekenis van die Pasga
- ❖ Die Paaslam en die Lam van YHVH
- ❖ Ons Erfenis Onder die Hernieuwe Verbond
- ❖ Hoe om Pesag te gedenk
- ❖ Bepeins en Bespreek

INLEIDING EN HERSIENING

1. In Les 1 van hierdie studie het ons geleer dat die sewe feeste (Bestemde of Aangewese tye, *mo'edim*) van YHVH 'n profetiese afbeelding is van die Vader se plan van sondevergifnis, versoening met Hom en van herstel van Sy skepping. Hierdie feesdae is afsprake (heilige vierdae, *miqra'ot*) met die Vader en elkeen is 'n heenwysing na Yeshua Messias en hoe daardie gedeelte van YHVH se plan in Messias vervul is, vervul word en nog vervul sal word. Die sewe feeste gee vir ons 'n terugblik van wat reeds gebeur het, insae in wat tans gebeur en 'n toekomsblik van wat gaan gebeur. Dit is ook 'n afbeelding van hoe elkeen wat deur geloof in Yeshua as Messias regeverdig verklaar is, moet lewe.
2. In Les 1 het ons ook geleer dat die bestemde tye van YHVH, soos ondermeer in Levitikus 23 uiteengesit word, in drie feesseisoene verdeel word, naamlik:
 - 2.1. Eerste feesseisoen bekend as Pesag wat bestaan uit drie opeenvolgende feeste, naamlik: Paasfees (Pesag), Fees van Ongesuurde Brood en die Fees van die Eerstelingsgerf (Eerstelinge).

- 2.2. Tweede feesseisoen bekend as *Shavuot* (Pinksterfees; Fees van Weke).
- 2.3. Derde feesseisoen bekend as *Sukkot* (Loofhuttefees) wat bestaan uit drie opeenvolgende feeste, naamlik die Fees van Trompette (*Yom Teruah; Rosh Hashanah*), Die Dag van Versoening (*Yom Kippur*) en die Fees van Tabernakels (*Sukkot; Chag Sukkot*). Op YHVH se jaarlikse afspraakkalender is daar egter nog 'n bestemde tyd wat die Agste Dag (*Sh'mini Atzeret*) genoem word en wat deel vorm van die seisoen van *Sukkot*.
3. YHVH het dus jaarliks agt formele afsprake met Sy volk – ontmoetings waar Hy die inisiatief neem en 'n uitnodiging aan elkeen van Sy kinders rig. Daar word egter deurgaans verwys na die sewe bestemde (aangewese) tye (feestye) waar die getal 7 op die voltooiing en volmaaktheid van YHVH se plan dui en dan die Agste Dag wat 'n nuwe begin aankondig.
4. In hierdie studie van die Feestye van YHVH moet dit altyd onthou word dat die Bestemde Tye, net soos die tabernakel, priesterorde en offerandes, 'n heenwysing na Yeshua Messias is (Joh. 5:39 en 40) en derhalwe 'n heenwysing (sinnebeeld) van YHVH se totale verlossingsplan is. Deur die feestye te gedenk sien ons die skaduwee van Messias – 'n skaduwee wat deur Sy liggaam gevorm word vanweë YHVH se Lig wat op Yeshua skyn.

Such (things) are only the shadow of things that are to come, and they have only symbolic value. But the reality – the substance, the solid fact of what is foreshadowed, the body of it – belongs to Messiah. Kol. 2:17 (Amplified Bible)

5. Deur ons afsprake met die Vader op Sy bestemde tye jaarliks te gedenk, word ons herinner aan YHVH se totale plan van herstel en word ons deel van hierdie werklikheid soos wat dit plaasgevind het en besig is om plaas te vind. Dit is 'n herinnering van wat reeds gebeur het, van wat besig is om te gebeur en van wat nog sal gebeur. Hierdie jaarlikse afsprake is ewige instellings en elkeen het 'n uitnodiging om dit te aanvaar of te verwerp.
6. Pesag is die eerste van die drie feeste van die eerste feesseisoen en word in die lente van die Noordelike halfrond gedenk. Soos reeds genoem is hierdie drie lentefeeste Pesag (die Pasga; Paasfees), die Fees van die Ongesuurde Brode en die Fees van die Eerstelingsgerf (Fees van Eerstelinge). Hierdie drie feeste is aaneenlopend. Daar word na Pesag ook as die Fees van Ongesuurde Brode verwys (Mark. 14:1 en 12 tot 14).
7. In hierdie les sal Pesag bespreek word, terwyl die Fees van Ongesuurde Brode en die Fees van die Eerstelingsgerf in Les 3 en 4 onderskeidelik bespreek sal word. Die opdrag vir hierdie drie feeste vind ons in Lev. 23:4 tot 11

Dit is die feestye van Yahweh, die afgesonderde byeenkomste wat julle moet uitroep op hulle bepaalde tyd. In die eerste maand, op die veertiende van die maand, tussen die aande, is die Pesag van Yahweh; en op die vyftiende dag van hierdie maand is die Fees van die Ongesuurde Brode van Yahweh; sewe dae lank moet julle ongesuurde brode eet. Op die eerste dag moet daar vir

julle 'n afgesonderde byeenkoms wees; geen beroepswerk mag julle doen nie. Maar julle moet sewe dae lank aan Yahweh 'n vuuroffer bring. Op die sewende dag moet daar 'n afgesonderde byeenkoms wees; geen beroepswerk mag julle doen nie. En Yahweh het met Mosheh gepraat en gesê: Spreek met die kinders van Yiesraél en sê aan hulle: As julle in die land kom wat Ek julle gee en sy opbrings oes, moet julle 'n omer van die eersteling van julle oes na die priester bring. En hy moet die omer voor die aangesig van Yahweh beweeg, sodat julle aanvaarbaar kan wees; die dag na die Shabbat moet die priester dit beweeg. (Woord en Getuienis)

INSTELLING EN BETEKENIS VAN PESAG

1. Volgens die Skrifte (Bybel) moet Pesag op die 14 dag van die eerste maand gedenk word.

En YHVH het met Moses en Aäron in Egipteland gespreek en gesê: Hierdie maand moet vir julle die begin van die maande wees; dit moet vir julle die eerste van die maande van die jaar wees. Ex. 12:1 en 2.

Volgens die huidige Joodse burgerlike kalender is dit egter die sewende maand bekend as Nisan wat ook Aviv (Abib) genoem word, terwyl die Joodse nuwe jaar (*Rosh HaShanah*) egter op die eerste van die maand Tishrei begin. Laasgenoemde datum is ook wanneer die Fees van Trompette (*Yom Teruah*) gedenk word en daarom staan die Fees van Trompette ook bekend as *Rosh Ha-Shanah*. Hierdie verskille is aanvanklik baie verwarrend. Verwys na Tabel 2 aan die einde van hierdie les vir meer duidelikheid oor die maankalender (YHVH se kalender / Joodse kalender) en die sonkalender (Gregoriese kalender). Verdere lesse in hierdie studie sal ook meer lig werp op hierdie verskille.

2. Pasag is die fondament waarop die ander ses bestemde tye (feeste) gebou word. Dit is die begin van YHVH se plan van sondevergifnis, versoening met Hom en die herstel van Sy Skepping. Die Pasga is die hart van die jaarlikse afspraak wat YHVH met Sy kinders het. Daarom is dit uiters belangrik om die doel en die betekenis van hierdie aangewese dag te verstaan en dit op gepaste wyse te gedenk. Dit is ook te verstane hoekom Satan juis miljoene Christene mislei het deur die ware Pasga met afgodery te besoedel. Daarom moet duidelike onderskeid gemaak word tussen Pesag en *Easter*, want hierdie is twee verskillende feeste. *Easter* het, net soos Kersfees, 'n heidense oorsprong. Meer hieroor in Les 13 en 14 onderskeidelik.
3. In Ex. 12:1 tot 14 word die instelling van Pesag op die vooraand van die uittog van Israel uit Egipte beskryf. Nadat YHVH vir Moses en Aäron die opdrag oor die begin van die maande van die jaar gegee het (Ex. 12:2), het YHVH ook beveel dat elkeen op die tiende van die eerste maand 'n jaaroud lam sonder gebrek per huisgesin moet neem en dit in bewaring moet hou tot die veertiende dag en dit dan *slag teen die aand*, naamlik laat middag (Ex. 12:3 tot 6). [**Onthou: Volgens die Skrifte begin en eindig 'n dag teen sononder**]. Met 'n bossie hissop het hulle die bloed aan die deurkosyne van hulle huise gesmeer as teken van die geslagde lam (Ex. 12:7, 13, 22 en 23) en van hulle geloof (vertroue) in YHVH se reddende genade. Verder het YHVH

beveel dat hulle die vleis in dieselfde nag, met ander woorde gedurende die nag van die 15 Nisan, moet eet nadat dit oor die vuur gebraai is. Hulle moes dit saam met ongesuurde brood en bitterkruie eet (Ex.12:8 tot 10 en in hulle huise tot die môre toe bly (Ex. 12:22). Ook moes hulle die pesag haastig eet terwyl hulle heupe omgord was en met hulle skoene aan hulle voete en hul staf in die hand (Ex. 12:11).

4. Hierdie opdragte het Israel in geloof (vertroue) uitgevoer. Hulle het geglo in die Elohiem van Abraham, Isak en Jakob. Deur geloof en gehoorsaamheid is Israel bewaar van die tiende plaag wat Egipte getref het, naamlik die dood van die eersgeborenes. Die geslagde lam en die bloed van die lam was hulle beskerming en die waarborg tot bevryding van die Egiptiese slawejuk.
5. Hierdie Bestemde Tyd moet as gedenktag vir ewig gevier word (Eks. 12:14, 24 en 42).

En hierdie dag moet vir julle 'n gedenktag wees, en julle moet dit as 'n fees tot eer van YHVH vier. Julle moet dit in julle geslagte as 'n ewige insetting vier.

Op die veertiende dag van die eerste maand het YHVH dus 'n afspraak gemaak wat jaarliks vir ewig nagekom moet word. Hierdie eerste afspraak (Bestemde Tyd) in Egipte was nie net die bevryding van Israel van die Egiptiese slawejuk nie, maar ook die sinnebeeld en heenwysing van die bevryding van die slawejuk van sonde vir elkeen wat sou glo in die ware Pesaglam, Yeshua Messias (Joh. 1:29 en 36; 1 Pet.1:19 tot 21).

6. As gelowiges van die hernieude verbond gedenk is ons steeds Pesag, nie net as herinnering van Israel se bevryding van die slawejuk van Egipte nie, maar ook as herinnering van die ware Pesaglam wat op hierdie dag geslag was sodat ons van ons sondeskuld bevry kon word. Hierdie dag is 'n spesiale ontmoeting op uitnodiging van ons Vader om ons te herinner aan Sy liefde die dag toe Hy Sy Eersgebore Seun gegee het, *sodat elkeen wat in Hom glo nie verlore mag gaan nie, maar die ewige lewe mag hê* (Joh. 3:16).
7. In Ex. 12:13 is geskrywe: *as Ek die bloed sien, sal Ek by julle verbygaan*. Die woord *verbygaan* (*pass over*) maak die ware betekenis van Pesag duidelik, naamlik:
 - 7.1. Die woord beskryf nie net die aksie van *om verby te gaan* of *om oor iets te gaan* nie, maar beteken ook om te beskerm op dieselfde wyse as wat 'n hen haar vlerke oor haar kuikens spreid om hulle te beskerm. Verwys Jes. 31:5 en Luk. 13:34.
 - 7.2. Derhalwe was daar midde in YHVH se oordeel ook Sy liefdevolle beskerming en verlossing vir die gelowige en gehoorsame Israeliet.
8. Geloof in die genade voorsiening van YHVH in die vorm van die geslagde lam was dus hulle redding en beskerming. Elkeen wat in sy huis *onder die bloed* gebly het, en deel gehad het aan die geslagde lam, is YHVH se oordeel gespaar (Eks. 12:13 en 23). Die bloed het dus as versoening met YHVH en vrywaring van Sy oordeel gedien.

9. Onder die hernieude verbond is die bloed van Yeshua Messias, die Lam van YHVH, ook ons redding en versoening met die Vader en die vrywaring van Sy oordeel. Die Pesag onder die ou verbond was `n afbeelding en heenwysing na Yeshua Messias, die Lam van YHHV, en van ons Elohiem se genadeplan van versoening en redding. Pesag onder die hernieude verbond is bevestiging van die vervulling van hierdie belofte. Vir elkeen wat glo in die versoening deur die bloed van Yeshua is daar redding en bevryding van die salwejuk van sonde.
10. YHVH het sy volk van die Egiptiese slawejuk bevry op grond van die verbond met Abraham. Die belofte van hierdie verbond was dat Abraham se nageslag in die beloofde land, Kanaän, sou woon. Na 430 jaar het YHVH Israel bevry. Die "prys" vir hierdie bevryding was `n onskuldige lam wat geslag was en die bloed wat aan die deurkossyne van elke huis gesmeer moes word.
11. Elke lam wat op die vooraand van die uittoeg uit Egipte geslag was, asook elke lam wat daarna ter viering van Pesag geslag was, het heengewys na die ware Lam van YHVH wat vir ons sondes gesterf het en wie se bloed die prys was vir bevryding van die sondejuk vir elkeen wat glo.
- omdat julle weet dat julle nie deur verganklike dinge, silwer of goud, losgekoop is uit julle ydele lewenswandel wat deur die vaders oorgelewer is nie, maar deur die kosbare bloed van die Messias, soos van 'n lam sonder gebrek en vlekkeloos, wat wel vooruit geken is voor die grondlegging van die wêreld, maar in hierdie laaste tye geopenbaar is om julle ontwil, julle wat deur Hom glo in Elohiem wat Hom uit die dode opgewek en Hom voortreflikheid gegee het, sodat julle geloof en hoop op Elohiem kan wees*
(Woord en Getuienis)
12. Yeshua Messias is ons Pesaglam wat vir ons geslag is (Joh. 1:28 en 29; 1 Kor. 5:7). Hy is die eenmalige offer wat alle sonde wegneem vir die wat glo in die kosbare bloed van die Lam van YHVH.
13. Die instelling van die Pesag was as `n nuwe begin vir Israel beskou. Dit was nie net beskou as die bevryding van die slawejuk van Egipte nie, maar ook as die begin van `n tydperk waar YHVH op `n nuwe wyse Homself aan Israel openbaar het. Wedergeboorte is ook `n nuwe begin in elkeen se lewe. Dit is die begin van `n geloofslawe in Messias waar YHVH as Vader Homself deur Sy Gees openbaar.
14. Die Israeliete moes die Pesag in hulle huise eet met hulle heupe omgord, skoene aan hulle voete en met hul staf in hulle hand. Dit beteken hulle moes gereed wees om Egipte te verlaat. Hierdie is `n afbeelding van hoe elke gelowige onder die hernieude verbond moet lewe. Eerstens is ons bevry van die slawejuk van sonde en tweedens moet ons daagliks deelname aan Yeshua hê op `n wyse dat ons gereed is om enige tyd ons liggaam (huis) te verlaat.
15. Verwys Tabel 1 vir `n Vergelyking van die die Pesaglam en die Lam van YHVH.

ONS ERFENIS ONDER DIE HERNIEUDE VERBOND

1. Die betekenis van die verlossing wat deur die folterdood van Yeshua en die kosbare bloed van die Lam van YHVH bewerkstellig is, word in Heb. 9:11 tot 15 opgesom, naamlik:
 - 1.1. Verse 11 en 12: Yeshua het as ewige Hoëpriester met sy eie bloed die hemelse tabernakel ingegaan en `n ewige verlossing teweeggebring. Geen verdere offer vir die sonde is nodig nie.
 - 1.2. Vers 14: Die bloed van Yeshua reinig ons gewete van dooie werke. Hierdie dooie werke is die offers onder die ou verbond wat nooit ware sondevergifnis kon bewerkstellig nie, want dit moes jaar na jaar plaasvind. Die onvermoë om YHVH se Torah (die wet) te onderhou was `n skuld- en gewetenslas weens skuldgevoelens en vrees vir die oordeel wat dit inhou. Die offers onder die ou verbond was `n herinnering aan die sondes, want die bloed van diere kon nie die sondes wegneem nie. (Heb. 10:3 en 4). Die kosbare bloed van Yeshua reinig ons egter van alle sonde en derhalwe ook van skuldgevoelens omrede ons nie die wet kan hou nie.
 - 1.3. Vers 15: Die bloed van Yeshua het verlossing van die oortredinge onder die ou verbond teweeggebring sodat ons die belofte van die ewige erfenis onder die nuwe verbond kan ontvang.

2. Hierdie ewige erfenis word in Hebreërs 8:10 tot 12 beskryf, naamlik:
 - 2.1. YHVH onderneem om Sy wette (Torah), naamlik Sy onderrig en instruksies, in ons verstand te gee en dit op ons hart te skryf. Dit beteken dat ons gehoorsaam aan ons Hemelse Vader se wil sal wees, want dit sal deel van ons innerlike mens wees, naamlik van ons gees en siel. Dit sal moontlik wees deur die Ruach HaKodesh (Heilige Gees) wat in ons woon en wat YHVH se wil bekend sal maak en ons die krag tot gehoorsaamheid sal gee. Hierdie erfenis waarborg dus `n innerlike verandering wat uitwendig sigbaar sal wees.
 - 2.2. Tweedens behels ons ewige erfenis dat YHVH ons as Sy kinders aanneem en daarom die volle verantwoordelikheid as Vader aanvaar. As Vader, en soos enige vader, wil Hy slegs die beste vir Sy kinders gee. HY word ons voorsiener en beskermer.
 - 2.3. Derdens onderneem YHVH as ons Vader om ons elkeen self te leer sodat ons Hom waarlik kan ken. Die hernieuwe verbond maak voorsiening om `n intieme verhouding met YHVH te hê deurdat ons toegang tot Sy geheimenisse het. Hierdie geheimenisse is in Yeshua (Kol. 2:2 en 3) en die Ruach HaKodesh (Heilige Gees) is die een wat ons sal leer en herinner aan al die woorde van die Lewende Torah (Joh. 14:26).
 - 2.4. Laastens is ons ewige erfenis die sekerheid van sondevergifnis. Yeshua het die eenmalige offer vir ons sondes gebring en geen verdere offerande is nodig nie (Heb. 9:11 en 12 en Heb. 10:11 en 12). Ons het die sekerheid dat Vader nooit weer aan ons

ongeregtighede sal dink nie. Dit beteken dat Hy ons oortredinge van die verlede nie teen ons sal hou nie. Wanneer ons weens swakhede sondig, is daar onmiddellike vergifnis as ons bely en om vergifnis vra (1 Joh. 1:9).

HOE OM PESAG TE GEDENK

1. Pesag is bevestiging van dit wat YHVH ons Vader deur Sy Seun, Yeshua Die Gesalfde Een reeds vir ons gedoen het. Op die veertiende dag van die eerste maand (Nisan) van YHVH se kalender het Yeshua Messias 'n folterdood gesterf en is die skuldbrief van al ons oortredinge uitgedelg en weggeruim deur dit aan die folterpaal vas te nael (Kol. 2:14). Ons is vry van die slawejuk van sonde en met YHVH versoen deur die kosbare bloed van die Lam – Yeshua Die Gesalfde Een.
2. Hierdie is die belangrikste dag en gebeurtenis in YHVH se plan van vergifnis, versoening en herstel. YHVH het jaarliks op hierdie dag 'n afspraak met Sy kinders om hulle te ontmoet en hulle te herinner aan Sy genade (guns) wat Hy deur Yeshua aan elkeen bewys wat glo.
3. Daar is verskillende wyses hoe ons hierdie dag kan gedenk. Die belangrikste is om dit te gedenk op die dag wat YHVH vasgestel het, naamlik die veertiende dag van die eerste maand, en nie op die datum soos deur die kerk vasgestel is nie. Talle gelowiges wat terugkeer tot hulle Hebreuse wortels vier Pesag op gepaste wyse deur 'n Pesagmaaltyd (Sedermaal) as gesin, of saam met familie en vriende, te eet soos wat dit vir eeue reeds gedoen word en ook soos dit in die tyd van Yeshua Messias gedoen was.
 - 3.1. Die Pesagmaaltyd word gewoonlik teen die aand (sonder) van die 14 Nisan geëet, met ander woorde aan die einde van die 14 Nisan en met die aanvang van die 15 Nisan. [Onthou dat volgens die Skrifte, en derhalwe die Jode, begin 'n nuwe dag teen sonder]. Dit beteken dat die sedermaal deel sal vorm van die begin van die 15e dag van Nisan wat ook die begin van die Fees van Ongesuurde Brood is en wat sewe dae duur. 'n Handleiding hoe om 'n sedermaal te hou word aan die einde van hierdie studie aangeheg (Verwys Bylaag: Die Pesagseder Handleiding).
 - 3.2. Pesag word nie as 'n spesiale shabbat gedenk nie. Dit word beskou as die dag van voorbereiding om teen laat middag (sonder) die Pesagmaal saam met familie en vriende te eet in 'n huis waar alle suurdeeg verwyder is. Die Pesagmaal vorm dus deel van die eerste Shabbat van die Fees van Ongesuurde Brood.

Tabel 1: Vergelyking van die die Pesaglam en die Lam van YHVH

Ou Verbond: Die lam van die Pesag	Hernieude Verbond: Die Lam van God
<p>ʼn Lam sonder gebrek moes vir vier dae in bewaring gehou word. (Eks. 12:3, 5 en 6). Die doel was om seker te maak dat die lam geen gebrek gehad het nie. Slegs dit wat sonder liggaamsgebrek was, mag aan God geoffer word (Deut. 15:21).</p>	<p>Yeshua Messias was die Lam van YHVH sonder sonde (gebrek) (Heb. 4:15; 1 Pet. 1:19). Selfs Pilatus kon nie vir Yeshua skuldig bevind nie (Matt. 27:24).</p>
<p>Die Lam was gekies om geoffer te word (Eks 12:6).</p>	<p>Die Lam van God was reeds voor die grondlegging van die wêreld bestem gewees om vir die sondaar te sterf (1 Pet. 1:19 en 20). Yeshua was soos ʼn lam wat na die slagplek gelei word (Jes. 53:7).</p>
<p>Die lam moet geëet word nadat dit oor die vuur gebraai was (Eks. 12:9 en 10).</p>	<p>Vuur in die Skrif verwys na YHVH se oordeel. Yeshua het as die Lam van God die straf wat vir ons bestem was op Hom geneem (Jes. 53:5 en 6). Hy wat geen sonde gedoen het nie, het sonde vir ons geword sodat ons deur YHVH geregverdig verklaar kan word (2 Kor. 5:21).</p>
<p>Geen been van die paaslam was gebreek nie (Eks. 12:46; Num. 9:12) (sonder gebrek).</p>	<p>Die soldate het nie die bene van Yeshua tydens die kruisiging gebreek nie (Joh. 19:33 tot 36).</p>
<p>Elkeen in elke huisgesin moes eet van die lam ten einde deel van YHVH se reddingsplan te wees. Redding deur die dood van die paaslam was dus ʼn persoonlike sowel as ʼn gemeenskaplike saak.</p>	<p>Versoening met YHVH is ʼn persoonlike saak. Elkeen word gered op grond eie geloof en eie belydenis (Rom. 10:9 en 10). Verwys Gal. 2:20 – my lewe wat ek nou leef, leef ek deur geloof in die Lam van God wat vir my gesterf het. Ek is egter deel van die liggaam van Messias op grond van ʼn gemeenskaplike geloof in Messias (Eks. 12:41; Rom. 12:5; 1 Kor. 12:12 en 13). Verlos deur die bloed van die Lam behoort ons almal aan YHVH.</p>
<p>Die bloed moes by die ingang, aan die deurkossyne, gesmeer word en was die teken (bewys)(Eks 12:13 en 23). Die Israeliete het in hulle huis ingegaan deur die bloedverseelde deur waar hulle in bewaring gehou was.</p>	<p>Yeshua is die deur na die waarheid en die lewe (Joh. 10:9; 14:6). Sy bloed is die bloed van die hernieude verbond (Matt. 26:28) Deur die bloed het ons deel aan Yeshua (Joh. 6:53 tot 56) – dit is ons beskerming.</p>
<p>Die gebraaide paaslam moes saam met ongesuurde brood en bitterkruie geëet word (Ex. 12:8)</p>	<p>Ons moet die suurdeeg (sonde) uit ons lewens verwyder (1 Kor. 5:7 en 8) en die bitterkruie moet as herinnering dien van die gevolge van sonde (Rom. 6:23)</p>
<p>Die Pasga is die verbondsmaaltyd van die ou verbond.</p>	<p>Die Pasga is die verbondsmaaltyd van die hernieude (nuwe) verbond.</p>

TABEL 2: VERGELYKING VAN DIE MAANKALENDER EN DIE SONKALENDER

YHVH se kalender	Joodse Burgerlike kalender	Name van die Maande		Landbou-seisoene	Fees-seisoene
		Joodse benaming	Westerse kalender (Gregoriese)		
1	7	Nisan (Aviv/Abib)	Maart-April	Garsoes	Pasga <i>Pesach</i>
2	8	Iyar (Ziv)	April-Mei	Garsoes	
3	9	Sivan	Mei-Junie	Koringoes	Pinkster <i>Shavuot</i>
4	10	Tammuz	Junie-Julie	Druiwesoes	
5	11	Av (Ab)	Julie-Agustus	Olyfoes	
6	12	Elul	Augustus-September	Dadel en vyeoes	
7	1	Tishrei (Ethanim)	September-Oktober	Eerste reëns	Loofhutte <i>Sukkot</i>
8	2	Cheshvan (Bul)	Oktober-November	Ploeg	
9	3	Kislev	November-Desember	Koring en garsaai	
10	4	Tevet (Tebeth)	Desember-Januarie	Winter reëns	
11	5	Shvat (Shebat)	Januarie-Februarie	Amandels bloei	
12	6	Adar	Februarie-Maart	Sitrusoes Laat reëns	
13		Adar Sheni (Adar 2)			

Joodse (Hebreeuse) kalender: Word vasgestel volgens die beweging van die maan om die aarde. Dit neem die maan 29,5 (29,530589) dae om 'n voltooide sirkel om die aarde te maak. Dus 12 maande = 354 dae (354 dae, 8 uur en 48,54 min.) in 'n maanjaar. 'n Dag bevat ook 24 uur maar 'n nuwe dag begin teen sonder (ongeveer 18:00) op grond van Gen. 1:5, 8, 13, ens. Die huidige Joodse kalender is gebaseer op die Babiloniese kalender, maar bevat ook elemente van die Kanaänitiese kalender. Israel het aanvanklik, en volgens die Skrifte, slegs die maande by wyse van numeriese waarde onderskei.

Gregoriese kalender: Word vasgestel volgens die beweging van die aarde om die son. Dus 12 maande = 365 (365dae, 5 uur en 46,069 min.) dae in 'n sonjaar. Hierdie kalender is gebaseer op die antieke Egiptiese kalender wat deur Julius Ceasar in 46 vC aangepas was (Julian kalender) en wat later weer deur Pous Gregory XIII in 1582 verder aangepas was (Gregoriese kalender).

`n Sonjaar is dus ongeveer 11,25 dae langer as `n maanjaar. Derhalwe voeg die Jode `n maand van 29 dae (Adar Sheni / Adar II) aan die einde van elke tweede of derde jaar by om aan te pas by die sonjaar en die korrekte seisoene.

Volgens bogenoemde is dit dus duidelik hoekom die datums volgens die maankalender (Joodse kalender) nooit op dieselfde datum volgens die sonkalender (Gregoriese) sal val nie, maar van jaar tot jaar sal verskil.

BEPEINS OF BESPREEK DIE VOLGENDE:

1. Sondig diegene wat Pesag op `n ander datum as die 14 Nisan gedenk, byvoorbeeld op die datum soos deur die kerk vasgestel word, naamlik Goeie Vrydag en Opstanding Sondag? (Verwys Les 13: Die Misleiding van Paasfees).
2. Is `n datum vir YHVH belangrik of is die gesindheid van ons hart die belangrikste? Hierdie vrae moet gesien word in die lig daarvan dat selfs in die geledere van die Messiaanse Beweging is daar verskille oor hoe die begin van `n nuwe maand vasgestel moet word en gevolglik op watter dag die 14 Nisan van elke jaar sal wees. Daar is die kalender van Judaïsme en die kalender van die Karäiete. Later meer oor hierdie verskille.

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalom tot volgende keer.
Johan Kriel

Epos: kontak@nuweliëd.info
Webwerf: <http://www.nuweliëd.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.